

Hebreos, mé carta cuahān nuú na Israel

Nachindahá Ndióxi Jesucristo ña ná quixi a jáyaha tuhun Ndióxi nu yo

1 Cuahá ndivaha tañu nacahan Ndióxi sanahá xihín tásahnu jícó yo. Ta cuahá ndivaha nuú nacahan xihín ná tá najáyaha na profeta tuhun cáhan mé á nuú ñayivi. ²Joo tiempo nu ndíhí yóho nachindahá mé á Jesucristo, in túhún jini já jahyi a ña ná jáyaha tuhun Ndióxi nu yo viti. Ta nacaja Ndióxi ña nacavaha Jesucristo ndijáá ñaha ñuyíví xihín ñaha indiví. Ta najándacoo Ndióxi tóco ndihi ñaha yóho ndáha mé á. ³Ta mé á quéa náha ndá quiahva cáhnu cúu Ndióxi jáchi yéhe a tá quiahva yéhe Ndióxi. Ta tá quiahva cáa Ndióxi quiahva já cáa ri Jesucristo, jahyi a. Ta xihín tuhun cáhan yúhu mé á cómi a cuénta saha tóco ndihi ñaha jáchi iin ndivaha ndée tuhun mé á. Ta nandaja vií mé a mí nuú ndihi cuachí ta já nasacoo a indiví xoo cuáha Ndióxi, tátá a.

Cáhnu chága Jesucristo a juú ga táto Ndióxi

⁴Ta Jesucristo, mé jahyi Ndióxi naxinu a nanduu a ña cáhnu chága a juú ga táto Ndióxi. Ta nacaja Ndióxi ña ná ñehe táhvi á ña cáhnu chága quivi naní a a juú ga quivi táto mé á. ⁵Jáchi a ñaha cachi Ndióxi xihín ni in túhún toho táto mé á tá quiahva nacachi a xihín jahyi a já:

Jahyi yéhe cúu yóhó,

ta viti cáchí i ña nanduu u tátún, cáchí a.

Ta ni coó nacachi Ndióxi xihín ni in túhún toho táto á tá quiahva nacachi a xihín jahyi a já:

Yehe cacuu u tátún,

ta yóhó cacuún in túhún jini já jahyi yéhe, cáchí a.

⁶Joo tá jalóho cúni chindahá Ndióxi Jesucristo, jahyi a ñuyíví yóho já nacachi a já:

Ndítahan nu tóco ndihi táto mí i caja cáhnu na jahyi i, nacachi a.

⁷Já nacachi Ndióxi já saha táto mé á:

Tá quiahva cama chá xícó tachi quiahva já cama chá cuahān táto mí i.

Ta yéhe na tá quiahva yéhe ñuhú cáyi ita, já nacachi Ndióxi.

⁸Joo tá nacahan Ndióxi sahá jahyi a já nacachi a já:

- Yóhó cúún Ndióxi ta cacomún cuéntá sahá ñayivi anda ama cáa quivi,
ta cáhndún chuun xihín ña ndaa.
- ⁹Ta a juú quiahva cátóún ña vaha ta nacandajún ña núu.
Sahá ña cán quéa nacaxi i yohó jáchi yehe cúú u Ndióxi ta cúú u tátún.
Ta najáchutú ndaa i yohó xihín ña cájii inún já ná cajii chága inún a juú ga na xica xuhun, nacachi a.
- ¹⁰Ta jári já nacachi a já xihín jahyi a:
Nacavahún tóco ndihi ñaha tá nacava sahá saha ñuyívi ta cúún xitoho nuú ña cán.
Ta xihín ndáhun nacavahún indiví.
- ¹¹Ta vaxi quivi tá ndihi saha tóco ndihi ña yoho joo mún coo tá coún anda ama cáa quivi.
Ta tóco ndihi ña jan cayatá ña tá quiahva cayatá jáhma ndíxi na.
- ¹²Tá quiahva sáhnú ñayivi jáhma quiahva já chichahnún ñuyívi xihín indiví.
Ta tá quiahva ndíjama ñayivi jáhma ndíxi na quiahva já ndíjama ña jan cajún.
Joo mún a ndíjama tohún jáchi coo tá coún anda ama cáa quivi,
ta a ndíjama tohún ta a ndíhi toho sahun, nacachi Ndióxi xihín Jesucristo.
- ¹³A ñaha cachi Ndióxi xihín ni in túhún toho táto mé á tá quiahva nacachi a xihín jahyi a já:
Naha quíi cacoún xoo cuáha i yoho,
janda quiahva ná cahnu i nu tóco ndihi na co cúní yohó ta janda ná chinduu u na sahun jan, nacachi Ndióxi xihín Jesucristo.
- ¹⁴Jáchi tóco ndihi táto Ndióxi cúú ná na tácu ta iin ínimá ná joo coo toho yiquí cuñu na. Cája chúun na cuéntá Ndióxi ta mé á chindahá a na ñuyívi ña ná chindeé na ñayivi, na nacaxi Ndióxi cacu ndaa ínimá.

Naquixi Jesucristo jácacu a mí

2 Sahá ña cán quéa ndítahan nu yó taa johó í ña ndaa, ña naxini johó í já ná a cáxoo í íchi cuéntá Ndióxi. ²Nacahan táto Ndióxi tuhun nasahan mé á nu ná ta cúú á ña ndaa joo coo naxeen ñayivi cacu vaha na ña. Sahá ña cán quéa najándoho Ndióxi ini na tá quiahva ndítahan ndoho ini na sahá cuachi nacaja na. ³Joo mí, ndaja caja í cacu ndaa ínimá yo tá ta co taa johó í tuhun cahán sahá Jesús, mé a jácacu mí. Ta ña yoho cúú á ña cáhnu ndivaha jáchi jihna ñúhú ga mé Jesucristo, xitoho í nacaxi tuhun a ña yoho nuú ñayivi. Ta na nataa johó nu cahán mé á, na cán sahan na

tuhun na nu yo ña cúú á ña ndaa. ⁴Ta náha Ndióxi ña cúú á ña ndaa jáchi cája mé á cuahá ndivaha ña náhnu xihín ña xítuhún ndivaha. Ta nachindahá Ndióxi ínima yíi mé á nuú na cúú cuéntá Jesús ña ná caja na ña xítuhún tá quiahva nasacu ini mé á caja na.

Nanduu Jesucristo in ñayivi

⁵Coó nasahan toho Ndióxi ñamaní nu tátó mé á ña ná cacomí na cuéntá sahá ñuyiví saá, ña vaxi chága chí nuu. ⁶Jáchi já cáchí tuhun Ndióxi já:

Tátá Ndióxi, coó saha toho ñayivi ta coó ña náha cúú ná.

Joo mé ndó ñúhu ini ndó saha ná ta ndíhi ini ndó saha ná.

⁷Tá nacavaha ndó ñayivi nandaja ndó na nanduu na ña náhnu ndivaha.

Ta tátó mé ndó cuití va cúú ná nasayojó loho nu ná tixi chá tiempo.

Ta tóco ndihi ña nacavaha ndó nandiquiahva ndó ña ndahá ñayivi,

⁸já ná cacomí na cuéntá sahá, cáchí tuhun Ndióxi.

Ta mé a ndaa ni in ñaha coó nacando xoo jáchi nasacu ini Ndióxi cacomí ñayivi cuéntá saha tóco ndihi ñaha joo cámani yíi va xinu coo mé quivi cán. ⁹Vatí cámani yaha ña yóho joo xini yo ña nandoho Jesús. Tixi chá tiempo nacaja Ndióxi ña ná nuu ndáha chága mé á nu tátó Ndióxi jáchi sahá ña quíhvi ini Ndióxi mí sahá ña cán quéa nasacu ini a ña ná quivi Jesucristo sahá ndihi ñayivi. Ta viti nandindita mé á nanduu a ña cáhnu ndivaha sahá ña nandoho a tá naxihí a ndica cruxu.

¹⁰Tóco ndihi ñaha ña nacavaha Ndióxi cúú á cuéntá mé á sahá ña nacachi mé á ña ná coo a. Ta nasacu ini a ña ná ndoho ini Jesucristo quivi a saha yo. Ta xihín ña yóho najáxinu coo a nuú chuun natahnda nu á ña ná jácacu a mí. Jáchi ña cúni Ndióxi cúú ña ná canduu ndihí, na cúú cuéntá mé á nu íin a. ¹¹Nandaja víi Jesucristo mí ta sahá ña yóho cúú yó jahyi Ndióxi. Ta viti Ndióxi cúú tátá ndihí ta cúú á tátá Jesucristo. Ña cán quéa co cácahan toho nuú Jesucristo cahan ñani a mí ta cahan quiahva mí viti. ¹²Jáchi nacahyi ini tuhun Ndióxi ña nacahan Jesús xihín tátá a. Ta nacachi a já:

Ndicaní i nuú ñani i saha mé ndó.

Ta nu ndítutú na cata i caja cáhnu i ndohó, cáchí Jesús.

¹³Ta cáchí tucu a já:

Yehe cándée ini i Ndióxi, tátá i.

Ta cáchí tucu a já xihín Ndióxi:

Yóho íin i xihín ndihi jahyi ndó, na nasahan mé ndó nuú i cacomí i cuéntá saha, cáchí Jesús.

¹⁴Sahá ña íin yiquí cuñu ñayivi, na cúú jahyi Ndióxi sahá ña cán quéa nanduu Jesús in ñayivi ta nasahin yiquí cuñu a tátuhun mí. Ta tá naxihí

yiquí cuñu a já nacandeeé a nasahnu a nuú tiñáhá sacuahá, rí cája ña xihí ñayivi. ¹⁵Ta xihín ña yóho najácacu a tóco ndihi na nasayihví quivi jáchi níí tiempo nasanduu na ndáha tiñáhá sacuahá sahá ña yíhví na. ¹⁶Jáchi mé a ndaa coó naquixi Jesucristo ña ná chindeeé a na cúu tát Ndióxi. Ña naquixi mé á caja queá chindeeé a ñayivi, na cándeeé ini Ndióxi tá quiahva nacandeeé ini Abraham Ndióxi. ¹⁷Ña cán queá naxini ñúhú Jesús nduu a in ñayivi cácu ñuyíví yóho tátuhun mí. Ta xihín ña nandoho a naxinu a nanduu a in jutú sacuahá nu Ndióxi indiví. Ta naxihí a ndica crúxu sahá cuachí jáchi cája ndaa mé á tóco ndihi ñaha ta táhvi ini a saha yo. Ta xihín ña yóho nacaja cáhnu ini a sahá cuachí. ¹⁸Ta sahá ña nandoho ini mé á ta sahá ña naxito ndojó rí quini mé á sahá ña cán queá xini a ndá quiahva ndóho iní. Ña cán queá cuu chindeeé a ndaja táhan na ndóho ini, na xito ndojó tiñáhá sacuahá.

Cáhnu chága Jesús a juú ga Moisés

3 Candehé ndo, ñani i, na cúu cuéntá Jesús. Mé ndó cúu ndó na nacaxi Ndióxi cacomí a cuéntá saha. Candehé ndó Jesucristo, mé á cúu á tátuhun apóstol, ña nachindahá Ndióxi cacuu jutú sacuahá saha yo nu Ndióxi sahá ña cándeeé iní mé á. ²Ta xihín ndinuhu ini a nacaja chúun a cuéntá Ndióxi, mé a nacaxi ñahá. Jáchi tá quiahva nacaja Moisés tóco ndihi ña cúní Ndióxi tañu na cúu cuéntá mé á quiahva já nacaja Jesús tóco ndihi ña cúní Ndióxi, tátá a. ³Joo ndítahan ndicáhnu chága Jesús a juú ga Moisés jáchi cáhnu chága Jesús a juú ga Moisés. Cúu á tátuhun tá cávaha in dataa in vehe ta ndítahan ndicáhnu chága mé dá a juú ga vehe da. ⁴Ndúsa coo in da cávaha vehe já cuu cavaha ña joo tóco ndihi ñaha íin a jáchi nacavaha Ndióxi ña. ⁵Ña cán queá nacaja chúun Moisés cuéntá Ndióxi xihín ndinuhu ini da tañu ñayivi mé á. Ta chuun nacaja da queá cáxi tuhun jini da xihín ná ña cúní Ndióxi cahan xihín ná chága chí nuu. ⁶Joo jín va chuun nacaja Jesús, mé á cúu in túhún jini já jahyi Ndióxi jáchi comí a cuéntá sahá na cúu cuéntá mé á xihín ndinuhu ini a. Cuéntá mé á cúu mí tá ndacú coo ínima yó ta tá ná candeé iní mé á. Ta xini ñúhú cajii iní candatí anda quixi mé á.

Cúní Ndióxi ña ná ndihvi na cúu cuéntá mé á nuú ndiquehe ndée ná

⁷Candehé ndó ndá quiahva cáchí ínima yii Ndióxi ini tuhun mé á tá cáchí a já:

Tá ná cuni johó ndó ña cahan Ndióxi xihín ndó quivi víti,

⁸a cája sáa ini ndó xihín á tá quiahva nacaja na Israel tá naxica nuu na yucú íchí cán.

Jáchì nandìñehe yúhu ná nù Ndióxi ta ihvi ndivaha nasacuu ini na xihìn Ndióxi.

⁹Ta já cáchì Ndióxi já:

“Mé yucú íchì jan naxito ndojó tásáhnù jícó ndó yehe, vatí naxini na ña náhnù ndivaha nacaja i tixi ivi jícó cuia.

¹⁰Sahá ña cán quéa naxojo ini i xihìn tóco ndihi na cán, ta nacachi i saha ná ña cúu ná na cáhvi ivi, johó ini, ta sáá ini na caca na íchì cuéntá mí i.

¹¹Sahá ña cán quéa naxojo ini i xihìn ná, ta nasahan i tuhun i ña a quiáhva toho i ñamanì nù ná ndihvi na nuú ndiquehe ndée na xihín i”, nacachi Ndióxi xihín na Israel.

¹²Ña cán quéa cuéntá vaha coo ndó, ñani i já ná a cáñehe ndó ínima quini ña jácaxoo ndó nù Ndióxi, ña tácu, sahá ña co cúnì ndó candúsa ndó mé á. ¹³Ña ndítahan caja ndó quéa quiahva tuhun ndeé ini táhan ndó nini quivi. Ta a quiahva ndó ñamanì yaha quivi víti tá núná nù ndó caja ndó ña cúnì Ndióxi. Jáchì co cúnì a ña ná jándahvi ña núu ñuyíví yóho ndohó ta já ná ndisáá ini ndó nù Ndióxi. ¹⁴Jáchì tá ná candeé ndusa iní mé á janda quiahva ná xinù quivi nù ndíhí cuíí tá quiahva nacaja í janda saha já quéa cúnì cachi a ña in nanduú xihìn Jesucristo.

¹⁵Jáchì quiahva já cáchì tuhun Ndióxi:

Tá xínì johó ndó ña cáhan Ndióxi xihìn ndo quivi víti, a cája sáá ini ndó xihìn á tá quiahva nacaja na Israel tá nandìñehe yúhu ná nù Ndióxi yucú íchì cán, cáchì a.

¹⁶Jáchì sa xínì ndó ndá na nandìñehe yúhu nù Ndióxi tá naxini johó na ña nasahnda mé á nù ná. Na cán cúu na tóco ndihi na nasandaca Moisés tá naqueta na nación Egipto. ¹⁷Ta xihìn mé na cán naxojo ini Ndióxi tixi ivi jícó cuia jáchì nacaja na cuachi nù mé á ta sahá ña cán quéa nacuyu na naxihì na yucú íchì cán. ¹⁸Ta sahá ña coo naxeen na caja na ña cúnì Ndióxi sahá ña cán quéa nasahan Ndióxi tuhun a ña a quiahva toho a ñamanì nù ná canduu na nuú ndiquehe ndée na xihín á. ¹⁹Ta mé a ndaa cándaa iní ña coo nacuu ndihvi na nuú nasacu ini Ndióxi coo na sahá ña co naxeen na candúsa na mé á.

4 Sahá ña cán quéa viti sahan yii va Ndióxi ñamanì nù yó yaha í nuú nasacu ini mé á ndiquehe ndée yo xihín á. Joo xínì núhú cuéntá vaha coo ndó jáchì tiahva náá a xinù coo java ndó ndihvi ndó cán. ²Jáchì tá quiahva naxini johó na Israel tuhun Ndióxi quiahva já naxini johó í tuhun mé á, ña cáchì a cúnì jácacu Ndióxi ñayivi. Joo coo nacandúsa na cán ña sahá ña cán quéa coo chuun a nù ná. ³Joo mí cúu yó na candeé ini Ndióxi

ta sahá ña yóho tandaa quiví xinu coo í ndihví nuú ndiquehe ndée yó xihin á. Ta já cáchí Ndióxi já sahá ña yóho:

Naxojo ini i xihin na co cándusa yehe, sahá ña cán quéa nasahan i tuhun i

ña ná a ndihvi toho na nuú nasacu ini i ndiquehe ndée ná xihin i, cáchí a.

Nacachi Ndióxi ña yóho vatí sa nacaja tiaha mé á nuú ndihvi na ndiquehe ndée na anda tá nacava sahá saha ñuyiví. ⁴Ndaa ini tuhun Ndióxi ña nacaja mé á quiví usa. Já cáchí a já:

Quiví usa nandiquehe ndée Ndióxi nuú chuun nacaja tá nacavaaha tóco ndihi ñaha, cáchí tuhun Ndióxi.

⁵Ta já cáchí tucu a já sahá na co cándusa Ndióxi:

A ndihvi toho na canduu na nuú ndiquehe ndée ná xihin i, nacachi a.

⁶Ta coo nandihvi toho na nacahan Ndióxi xihin nu cuítí cán jáchí coo naxeen na candusa na mé á. Joo núna yii va nuú java ñayivi ndihvi na ndiquehe ndée ná xihin mé á. ⁷Jáchí nasacu Ndióxi inga quiví ta cúu á quiví víti ta já cuu ndihvi ñayivi ndiquehe ndée na xihin mé á. Sanahá ndivaha nacahan Ndióxi xihin rey David sahá ña yóho ta nacahyí da ña ta já cáchí a já:

Tá xini johó ndó ña cáhan Ndióxi xihin ndó quiví víti a cája sáa ini ndó xihin á, cáchí tuhun Ndióxi.

⁸Ta sa xini yo ña coo najándihvi Josué ñayivi nu ndiquehe ndée na xihin Ndióxi jáchí nacahan Ndióxi sahá inga quiví vaxi chága chinuu. ⁹Sahá ña cán quéa sa xini yo ña cámani xinu coo quiví ndiquehe ndée na cúu cuéntá mé á tá quiahva nandiquehe ndée mé á quiví usa. ¹⁰Jáchí ndá na ná ndihvi ndiquehe ndée nu íin mé á cán já quéa ndiquehe ndée ná nuú chuun nacaja na tá quiahva nandiquehe ndée Ndióxi nuú chuun nacaja mé á.

¹¹Sahá ña cán quéa ndítahan ndihi iní ndihví nuú ndiquehe ndée yo cán. Ta ná a cája í tá quiahva nacaja na Israel cán tá coo naxeen na candusa na nuú nacahan mé á xihin ná.

¹²Íin cuaha ndée tuhun Ndióxi ta cúu á tátuhun ña tácu. Ta íin chága ndée tuhun Ndióxi a juú ga in yúchu ña ivi yúhu. Ta tá quiahva quíhvi yúchu ña ivi yúhu tá sáhdá yiquí cuñu quiahva já quíhvi tuhun Ndióxi janda maá ini ínima ñayivi xihin xini túni ná ta já xinu a ini na. Ta náha ndá quiahva cáhvi ini na. ¹³Jáchí xini Ndióxi tóco ndihi ñaha ta a cuú chijehé yo ña cáhvi iní jáchí sádehé mé á tóco ndihi ñaha nacavaaha mé á. Ta vaxi quiví nahma yó nu mé á tóco ndihi ña nacaja í.

Jesús cúú á jutú sacuahā nuú ndihí indiví

¹⁴Mé Jesús cúú á jutú sacuahā nuú ndihí sahā ña cán quēa co ndítahan jándacoo í ña cāndeé iní Jesús, mé a cúú in túhún jini já jahyi Ndióxi. Ta nandihvi a indiví nu in Ndióxi. ¹⁵Ta cándáhví ini Jesús mí jáchi cúú á jutú sacuahā nu yō ta cāndaa ini a ña cúú yō ñayivi vitá ndivaha ini. Jáchi tá naxica nuu a ñuyíví yóho naxito ndojó tiñáhá sacuahā mé á xihín tá nuú ñaha tá quiahva cája rí xihín mí joo ni in túhún cuachi coo ñacaja mé á.

¹⁶Ña cán quēa a cáyihví toho í cayatí nu in coo Ndióxi, mé a quíhví ini a mí jáchi táhví ini a saha yō ta chindeé a mí tá ná caca i ñamaní nu á.

5 Tóco ndihida cúú jutú sacuahā chága nu ndíhi jutú cúú dá da sá caxi na tañu ñayivi Israel já ná cahan cuachí da sahā ñayivi nu Ndióxi. Ta jári jóco da ñaha nu Ndióxi ta sáhní da quítí nu náa sahā cuachi na. ²Ta sahā ña cúú dá da vitá ini, da ñuyíví yóho sahā ña cán quēa cuu candáhví ini da ñayivi, na co xini ña sáhní Ndióxi. Ta cuu candáhví ini da na cája cuachi. ³Ta sahā ña vitá ini da sahā ña cán quēa ndítahan cahní da quítí jóco da rí nu Ndióxi sahā cuachi mé dá xihín sahā cuachi ñayivi viti.

⁴Ta ni in da cán a cúu chinúu da mé dá cacuu da jutú sacuahā chága nu ndíhi jutú. Jáchi xini ñúhú cacuu da da ñacana Ndióxi caxa chúun cuéntá mé á tá quiahva ñacaja Ndióxi sanahá tá ñacana mé á Aarón ña ná caxa chúun da cuéntá mé á. ⁵Quiahva já ñayaha xihín Jesucristo jáchi coo nachinúu a mé á ña ná nduu a jutú sacuahā. Ndióxi quēa nachinúu ñahá tá nandaja cáhnu a Jesús. Ta já ñacachi Ndióxi já xihín á:

Jahyi yehe cúú yóhó,

ta viti cáchí i ña nanduu u tátún, cáchí a.

⁶Ta inga nu cahan tuhun Ndióxi já cáchí a já:

Anda ama cáa quívi cacuún jutú,

ta cajún tá quiahva ñacaja in jutú, da ñasananí Melquisedec sanahá, cáchí a.

⁷Nani nasahiin Jesucristo ñuyíví yóho a juú quiahva naxica tahví a nu Ndióxi. Ta java tañu nasacu a ta java tañu ñacayuhú a nu Ndióxi, mé a cúú chindeé ñahá ña ná a quíví toho a. Ta sahā ña nasacaja Jesús tóco ndíhi ña sáhní Ndióxi, tátá a sahā ña cán quēa naxini johó Ndióxi nu cahan mé á.

⁸Ta vatí cúú Jesucristo in túhún jini já jahyi Ndióxi joo xihín ña nandoho ini a ñuyíví yóho ñacatiahva coo johó a nu cahan Ndióxi, tátá a xihín á.

⁹Ta xihín ña yóho najáxinu coo mé á ñacaja tóco ndíhi ña natahnda nu á caxa. Janda jáví nacuu jácacu a mí ña ná coo í xihín mé á anda ama cáa quívi tá ná caxa í ña sáhní mé á. ¹⁰Ta nandicojo a chuun ñacaja Ndióxi ña ná nduu a jutú sacuahā tátuhun mé jutú, da ñasananí Melquisedec.

Cuéntá coo ndó ná a jándacoo ndó ña cándéé ini ndó Jesús

¹¹Íin cuahá ndivaha ñaha cúní ndicani i nu ndo sahá ña yóho joo yáncá ndivaha ndicani i ña nu ndo jáchi co cúní ndo taa johó ndó nu cáhan i. ¹²Anda jihna nandihvi ndó íchi cuéntá Jesús ta viti sa ndítahan nu ndó jánaha ndó tuhun Ndióxi nuú ñayivi. Joo co cája ndó já jáchi nacavitá ndo ta tucu tucu jácuaha ndó ña co íhvi toho. Ta viti cúú á tátuhun co ndeé ini ndó cuxu ndó ña xíxi ñayivi náhnu joo ña cája ndó quéa xíhi yíi va ndó leche tátuhun na valí va. ¹³Ta tá quiahva xíhi na valí leche quiahva já cája ri na co tiáhva ndícuni ndíá cúú ña vaha ta ndíá cúú ña núu. ¹⁴Joo ñayivi, na cándaa vaha ini tuhun Ndióxi cúú ná tátuhun ñayivi náhnu, na tácu ini, na xíxi cuñu va jáchi sá tiáhva na ndícuni na ndíá cúú ña vaha ta ndíá cúú ña núu.

6 Sahá ña cán quéa ña ndítahan caja í quéa ndindacú chága yó xihín ñaha Ndióxi janda quiahva ná xinu coo í cacuú ñayivi tácu ini xihín ñaha Ndióxi. Co ndítahan jácuaha tucu ña najácuaha í tá jacá nandihvi íchi cuéntá Jesús jáchi ndítahan catiahva í ña jan. Ndítahan cándaa iní ña cacu ndaa ínima yó sahá ña cándéé iní Jesucristo cuití va ta co cúú á sahá ña cája í ña vaha. ²Ta sa cándaa iní ña ndítahan candúta na cúú cuéntá Jesús. Ta sa cándaa iní ndaja cája í chinúu ndáha yó jiní ñayivi tá xíca tahví yó nu Ndióxi saha ná. Ta sa cándaa iní ña vaxi quiví nditacu tucu tóco ndihi ndii ña ná caja vií Ndióxi saha ná. ³Sahá ña cán quéa cáchi i xihín ndó: Coho ndindacú chága yó xihín ñaha Ndióxi, tá ná quiahva Ndióxi ñamaní nu yó.

⁴Ta a cuú ga ndicó coo ñayivi nu Ndióxi tá sa najándacoo na ña nasandéé ini na mé á. Jáchi sa najándiyéhe Ndióxi ínima ná ña ná cándaa ini na saha mé á ta sa xíní na ndá quiahva íin ñaha Ndióxi. Ta janda ínima yíi Ndióxi sa nandacaan ínima ná. ⁵Ta sa nacandaa ini na tuhun vaha cáhan sahá Jesucristo ta sa nacandaa ini na ndá quiahva náhnu caja Ndióxi chága chí nuu. ⁶Joo tá ná jándacoo na jan ña cándéé ini na Ndióxi já quéa a cuú ga ndicó coo na nu mé á jáchi xihín ña cája na cúú á tátuhun cata caa tucu na Jesucristo, jahyi Ndióxi ndíca crúxu ta já sácu ndaa na mé á nuú ñayivi. ⁷Jáchi sa xíní ndo ndaja íin ñundáhyi nu cúun vaha javi ta ndíndahyi a. Ta tá ná cana cuahá ñaha nuú naxutu ñayivi cán já quéa cúní cachi a ña cája Ndióxi ñamaní xihín ñundáhyi cán. ⁸Joo tá ná nana tohíñú xihín tochihmá nu núhu cán já quéa coo saha toho a ta ña yóho cúní cachi a ña co cája toho Ndióxi ñamaní xihín á ta vaxi quiví cayi a caja Ndióxi.

Vaxi quiví coo í xihín Ndióxi tá co jándacoo í íchi cuéntá mé á

⁹Candehé ndó, ñani maní i, na cúú cuéntá Jesús. Vatí cáhan nde ña yóho xihín ndo joo cándéé ini nde ndohó ña cája tá cája ndó ña vaha ña

ndítahan caja na cándeé ini Jesús. ¹⁰Ta xíní nde ña cája Ndióxi ña ndaa cuití va ta a ndíndójó toho mé á sahá ña vaha nacaja ndó tá nachindeé ndó na cúu cuéntá Jesús jáchi xihín ña yóho náha ña quíhvi ini ndusa ndó mé á. Ta mé a ndaa janda viti chindeé ndó na cán. ¹¹Ta a juú quiahva cúni nde ña ná ndíhi ini in in ndó chindeé ndo na cúu cuéntá Jesús anda quívi nu ndíhi. Ta xihín ña yóho vaxi quívi tá quiahva Ndióxi nu ndo tóco ndíhi ña ndátí ndó quiahva mé á nu ndo. ¹²Co cúni nde ña ná cajúsá ndo caca ndó íchi cuéntá Jesús. Ña cúni nde queá ná ndíhi ini ndó caja ndó tá quiahva cája na cándeé ini Ndióxi, na coó najándacoo ña cándeé ini na mé á ta xihín ña yóho ñehe táhvi ná ña nasahan Ndióxi tuhun a quiahva nu ná.

¹³Tá nasahan Ndióxi tuhun a nu Abraham sanahá já natavá a quívi mé á tátuhun testigo jáchi coó inga ga ña cáhnu chága a juú ga mé á. ¹⁴Ta tá nasahan mé á tuhun a nu dá já nacachi a já xihín dá: “Mé a ndaa caja cuahá i ñamaní xuhun ta caja i ña ná ndicuahá ndivaha na quixi chichún.” Já nacachi Ndióxi xihín Abraham tá nasahan tuhun a nu dá. ¹⁵Ta coó nandíhi ini Abraham nani nasandati da jáxinu coo Ndióxi tuhun a ta chí nañehe dá ña nasahan Ndióxi tuhun a quiahva nu dá. ¹⁶Tá sahan ñayivi tuhun na nuú inga ñayivi já tává na quívi in na cáhnu chága a juú ga mé ná ña ná cacuu na testigo. Jáchi cája ndúsa in testigo xihín ná jáxinu coo na ña nasahan na tuhun na caja na. ¹⁷Sahá ña cán queá natavá Ndióxi quívi mé á jáchi cúni a jánaha cáxi a nuú ñayivi ña a ndíjama toho a tuhun nasahan nu ná ta ndúsa jáxinu coo a tuhun a nuú na ñehe táhvi ndiquehe a. ¹⁸Ta cándaa iní ña nasahan Ndióxi tuhun a nu yó ta natavá a quívi á cacuu a testigo ta xihín ndíví ña yóho sa xíní ví ña a cuú ndijama Ndióxi ta ni a cuú cahan mé á ña tuhún. Ta xihín ña yóho sahan mé á tuhun ndeé iní jáchi cándeé iní mé á ta sa nandiquiahva í mí ndáha mé á ña ná jácacu a mí. ¹⁹Sahá ña cán queá cátivi tuun í xihín Ndióxi ta cándeé iní ña quiahva mé á nu yo ña sahan tuhun a quiahva nu yo. Ta sahá ña cándeé cáhnu iní mé á sahá ña cán queá co yíhvi toho í cayatí nu mé á jáchi sa nandíhvi Jesús nuú yíi ndivaha indiví. ²⁰Ta cúni Jesús chindeé a mí ña ná xinu coo í nu íin a cán sahá ña cán queá nandíhvi jihna ñúhú ga cán a juú ga mí. Ta cuu caja Jesús ña yóho jáchi nanduu a jutú sacuahá nu Ndióxi ta anda ama cáa quívi cája mé á chuun yóho tá quiahva nacaja da naní Melquisedec sanahá ndivaha.

Chuun nacaja Melquisedec sanahá

7 Mé Melquisedec yóhonasacuu da rey nuú ñayivi ñuu Salem ta nasacuu da jutú nu Ndióxi, mé á cúu ña cáhnu chága a juú ga inga ga. In tañu tá nandíco coo Abraham nasahan da nacani táhan da xihín java rey

ta najándihi da sahá na cán já naqueta Melquisedec íchi nuú vaxi Abraham ta já nacaja yíi dá Abraham. ²Ta mé Abraham nandaja da uxu táhndá tóco ndihi ña nacandaa da ndáha java rey tá naquee vaha da xihín na cán. Ta já nasahan da in táhndá nuú Melquisedec. Ta quiví Melquisedec yóho cúni cachi a rey, da cája ña ndaa. Ta sahá ña cómi da cuénta sahá ñuu Salem, ña cúni cachi a nuú íin vaha ini ñayivi sahá ña cán quéa cúu dá rey, da cája ña ná coo vaha ini ñayivi. ³Ta ni in ñayivi co xíni na saha tátá náná mé Melquisedec yóho ta co ndaa nuú tutu quiví tásáhnú jícó da. Ta co xíni na ndá tañu nacacu da ta ni co xíni na ndá tañu naxihí da. Joo ña xíni na quéa cúu dá jutú anda ama cáa quiví tá quiahva cúu Jesucristo jutú anda ama cáa quiví, mé a cúu in túhún jini já jahyi Ndióxi.

⁴Ta viti cuu candehé ndó ndaja cáhnú nasacuu Melquisedec jáchi janda mé Abraham, da nasacuu tásáhnú jícó yo nasahan da nuú Melquisedec in táhndá nuú uxu táhndá ñaha ña nacandaa da ndáha rey, da naquee vaha da xihín cán. ⁵Ta sa xíni ndo ña cáchi ley Moisés ña íin saha nuú jutú, na naquixi chichi Leví ndiquehe na in táhndá nuú uxu táhndá ña cómi na Israel. Jáchi mé jutú cán cája chúun na nu Ndióxi cuénta táhan na na Israel vatí in cúu tóco ndihi na sahá ña naquixi ndihi na chichi Abraham. ⁶Vatí coó naquixi Melquisedec yóho chichi Leví joo naqueehe tá naqueehe da in táhndá nuú uxu táhndá ñaha nu Abraham, da nasahan Ndióxi tuhun a nuu ña caja cuahá ñamaní xihín. Tá nacaja yíi Melquisedec Abraham ⁷náha ña mé a ndaa cáhnú chága da cája yíi ñayivi a juú ga na nacayíi cán. Ta ni in na a cúu cachi na ña co cúu ña yóho ña ndaa. ⁸Ta sa xíni yo ña cáhnú chága Melquisedec a juú ga jutú, na naquixi chichi Leví, na quéhe in táhndá nuú uxu ñaha jáchi cúu ná ñayivi, na ndíhi saha. Joo cáhan tuhun Ndióxi sahá Melquisedec tátuhun tácu yíi va da. ⁹Ta náha ña cáhnú chága Melquisedec a juú ga Leví, da cúu tásáhnú jícó tóco ndihi jutú, na quéhe in táhndá nuú uxu a cán. Jáchi cúu á tátuhun nachahvi Leví in táhndá nuú uxu a tá nachahvi Abraham ña nu Melquisedec. ¹⁰Jáchi tá naqueehe Melquisedec in táhndá nuú uxu ñaha nu Abraham, cúu á tátuhun nasañehe Abraham tóco ndihi na vaxi chichi da ini yiquí cuñu da jáchi cámaní yíi cacu na mé tiempo já.

¹¹Ta tóco ndihi jutú, na naquixi chichi Aarón, naquixi na chichi Leví viti. Ta vatí nacaja na chuun Ndióxi ña jáyaha na ley Moisés nuú ñayivi joo a cúu nduu ndaa ñayivi nu Ndióxi xihín mé ley. Sahá ña cán quéa nachindahá Ndióxi Jesucristo ñuyiví yóho já ná cacuu a inga jutú, ña ná caja tá quiahva nacaja Melquisedec sanahá. Ta coó nacaja mé á tá quiahva nacaja Aarón, da nasacuu tásáhnú jícó jutú cán. ¹²Ta tá nachindahá Ndióxi in jutú saá xíni ñúhú a ndijama ri a ley va. ¹³Ta mé jutú saá cúu Jesucristo, xitoho í, mé a cáhan tuhun Ndióxi saha. Ta coó naquixi Jesucristo chichi

Leví ta ni coó naquixi a chichi Aarón. Jíin va chichi naquixi a ta ni in da taa naquixi chichi cán a ñáha cacuu da jutú. ¹⁴Joo cándaá vaha ini ñayivi ña naquixi Jesucristo chichi Judá ta co cúu á chichi nu sá cana jutú ta ni coó nacahan Moisés sahá na quíxi chichi Judá tá nacahan da sahá na cacuu jutú.

¹⁵Ta cándaá vaha chága iní ña yóho jáchi sa xini yo ña mé jutú saá ña cúu Jesucristo nandiquehe a chuun tátuhun nacaja Melquisedec sanahá.

¹⁶Ta coó nanduu a jutú sahá ña nacacu a chichi Leví nu sá cacu jutú. Joo nanduu a jutú sahá ña cúu cája tóco ndihi ñaha ta sahá ña tácu a anda ama cáa quivi. ¹⁷Jáchi tá cahan Ndióxi saha Jesucristo já cáchi a já:

Yóhó cúun jutú anda ama cáa quivi,

tátuhun mé jutú, da nasananí Melquisedec jáchi cájún chuun tá quiahva nacaja mé dá, cáchi tuhun Ndióxi.

¹⁸Sahá ña cán queá nacandoo xóo ley Moisés jáchi coó chuun a ta a cuú chindeé a ñayivi. ¹⁹Ta ni coó nacuu caju mé ley Moisés ña ná nduu ndaa ñayivi nu Ndióxi. Joo viti cájii iní jáchi xihín ña nacaja Jesucristo já cuu nduu ndaa yó nu Ndióxi ta já cuu cayatí nu mé á.

²⁰Ta tá nacaja Ndióxi ña nanduu Jesucristo jutú já nasahan tuhun a ta nasacu a mé á cúu á testigo sahá. ²¹Joo tá nanduu na naquixi chichi Leví cán jutú coó nasahan Ndióxi tuhun a saha ná tá quiahva nacaja xihín Jesucristo tá nanduu a jutú. Ta já nacachi Ndióxi ini tuhun mé á:

Yehe cúu Ndióxi ta nasahan i tuhun i nu yóhó ta a ndíjama toho i tuhun cahan i:

“Nachinúu i yóhó cacuún jutú anda ama cáa quivi.

Ta cajún chuun tá quiahva nacaja Melquisedec sanahá”, cáchi Ndióxi.

²²Sahá ña nandicojo Jesucristo chuun nasahan Ndióxi nu á sahá ña cán queá cándéé iní ña jáxinu coo Ndióxi tuhun nasahan nu yo. Ta vaha chága ña yóho a juú ga ley Moisés. ²³Ta ndaja coo nasanduu cuahá jutú, na naquixi chichi Leví cán jáchi naxihí ndihi na ta nacandoo chuun na nuú inga na. ²⁴Joo tácu Jesucristo anda ama cáa quivi ña cán queá a jándacoo toho a chuun a nuú inga ga. ²⁵Ña cán queá anda ama cáa quivi íin tiahva Jesucristo jácacu a mí tá ná cayatí nu Ndióxi sahá ña nacaja Jesucristo tá naxihí a ndica crúxu. Ta íin mé á nu Ndióxi xica tahví a nu mé á sahá na cándéé iní mé á.

²⁶Mé a ndaa xini ñuhú yo Jesucristo ña ná cacuu a jutú sacuahá nu Ndióxi saha yo. Jáchi mé á cúu á ña yii ndivaha ta ni in cuachi coó nacaja mé á ta ni in cuachi a cúu chicaan yó jatá. Ta co xica nuu ga mé á tañu na cája cuachi jáchi íin a indiví nu ndicáhu ndivaha mé á. ²⁷Co xini ñuhú caju Jesucristo tá quiahva nacaja java ga jutú sacuahá, na naquixi chichi

Leví. Jáchí nini quívi nasahní na cán quítí jóco na rí nu Ndióxi sahá cuachi ñayivi. Ta nu cuítí nacaja na ña sahá cuachi mé va na ta anda jávi nacaja na ña sahá cuachi ñayivi. Joo jíin va nacaja Jesucristo jáchi in túhún tañu cuití va najoco a mé á tá naxihí a ndica crúxu sahá cuachi tóco ndihi ñayivi. ²⁸Tá nacaja na ña cáchi ley Moisés já nasacu na in dataa, da cája cuachi ña ná cacuu da jutú sacuahá. Joo tá nandihí já nachinúu Ndióxi Jesucristo, jahyi a ña ná cacuu a jutú sacuahá, ña cája ña ndaa anda ama cáa quívi. Ta nasahan Ndióxi tuhun a nu yo ña jáxinu coo a tóco ndihi ña cáchi a.

Jesús cúu á jutú sacuahá sahá yo indiví

8 Nacachi nde ña yóho ña ná canda ini ndó ña cúu Jesucristo jutú sacuahá sahá yo nu Ndióxi ta íin coo a xoo cuáha Ndióxi indiví nu ndicáhnú ndivaha mé á. ²Cúu á jutú sacuahá cája ndíví a veñuhu indiví ña nacavaha Ndióxi ta co cúu á ña nacavaha ñayivi. ³Ndítahan nu tóco ndihi na cúu jutú sacuahá cahní na quítí nu Ndióxi ta jóco na ñaha nu á. Ña cán quéa ndítahan ri nu Jesucristo jóco a ñaha nu Ndióxi. ⁴Tá ná caca nuu Jesucristo ñuyíví yóho, nduu já quéa a cácuu toho a jutú, nduu. Jáchí sa ndúu cuahá ndivaha jutú ñuyíví yóho ta jóco na ñaha nu Ndióxi tá quiahva sáhndá ley Moisés. ⁵Joo ña cája mé ndihi jutú ñuyíví yóho cúu á tátuhun yuhú nuu ña cája Jesucristo indiví. Ta cánda iní ña cúu á tátuhun yuhú nuu ña íin indiví jáchi sanahá ndivaha tá nasahnda Ndióxi chuun nu Moisés ña ná cavaha da veñuhu xihín ní quítí já nacachi Ndióxi já xihín da: “Cuénta cóun ndaja cavahún veñuhu xihín ní quítí jan. Jáchí xíní ñúhú coo a tá quiahva cáa ña nanaha i nuún jiní yúcu cán”, nacachi Ndióxi xihín Moisés. ⁶Joo Jesucristo, mé á cúu jutú sacuahá sahá yo indiví nandicojo a in chuun ña vaha chága a juú ga chuun cája jutú ñuyíví. Vaha chága ña nacaja Jesucristo a juú ga ley Moisés jáchi jándique táhan mání a mí xihín Ndióxi ta xihín ña yóho xínu coo tuhun nasahan Ndióxi nu yó jihna.

⁷Tá ná cuu caja ley Moisés ña jácacu a mí ná a cúhun toho í indayá, nduu já quéa co xíní ñúhú quivi Jesucristo jándique táhan mání a mí xihín Ndióxi, nduu. ⁸Joo xíní vaha Ndióxi ña mé ley Moisés a cúu jácacu a ñayivi sahá ña cán quéa já nacachi a já:

Vaxi quívi tá quiahva i tuhun saá nuú ñayivi Israel ta nuú na naquixi chichi Judá.

⁹Jíin va cúu tuhun saá quiahva i nu ná,
jáchí co cúu toho a tuhun nasahan i nu tásáhnú jícó na sanahá
ndivaha,
tá natiin ndahá i na ta natavá i na nuú nasanduu na nación Egipto.

- Ta sahá ña coó najáxinu coo na tóco ndihi ña nasahnda i nu ná caja na sahá ña cán queá najándacoo i na.
- 10 Ta vaxi quivi tá quiahva i tuhun saá nuú ñayivi Israel.
Ta caja i ña ná candaa vaha ini na ley mí i ta cañuhu a ini ínima ná ña ná caja na ña cúni mí i.
Ta yehe cacuu Ndióxi caja cáhnu na,
ta mé na cán cacuu ñayivi cacomí i cuénta saha.
- 11 Ta a cúni ñúhú ga na jánahá ñani táhan mé ná ña ná candaa ini na saha Ndióxi,
jáchi tóco ndihi ñayivi anda na valí anda na sáhnu candaa ini na yo cúu yehe.
- 12 Ta caja cáhnu ini i saha ndaja táhan ña núu nacaja na,
ta a ndicuhun ga ini i sahá cuachi na, cáchí Ndióxi.
- 13 Tá nacahan Ndióxi sahá tuhun saá ña quiahva mé á nuú ñayivi já queá náha ña coó chuun ga mé tuhun nasahan nu ná jihna ta cama chá ndihi sahá.

Veñuhu ñuyívi xihín veñuhu indiví

9 Tánasahan Ndióxi tuhun a nuú na Israel sanahá ndivaha já nasahnda chuun sahá ndaja caja cáhnu na mé á ini veñuhu ña cávaha na ñuyívi yóho. ²Ta ndácaan ivi cuarto ini mé veñuhu cán. Ta ña ndácaan ini cuarto nu cuítí cúu in candelero xihín in mesa nu cándójó pan yíi. Ta mé cuarto nu cuítí yóho naní a in nuú yíi. ³Ta íin in jahmá ndeé ña ndájí nuu táhan tañu ndívi cuarto yóho. Ta cuarto ndácaan maá naní a nuú yíi ndivaha. ⁴Ta mé cán íin in nu náa ña nacavaha xihín jiuhun cuáán nu chíníhmá jutú jusa vaha. Ta jári cán íin sato arca ñaha Ndióxi ta tóco ndihi jata mé sato arca nandicuchu xihín jiuhun cuáán. Ta chí ini sato cán ndácaan in tindoño jiuhun cuáán nu ñúhu maná ña naxixi na Israel tá naxica nuu na yucú íchí cán. Ta jári ndácaan mé yító ñaha Aarón, dó nasaa núma sanahá. Ta chí ini arca cán ndácaan ri ivi yuu jáhnda nu ndáa ley nasahan Ndióxi nuú Moisés. ⁵Ta jini mé sato arca cán ndíndójó ña cúu yuhú nuu táto Ndióxi naní a querubines. Cándójó a cán ña ná ndicuhun ini ñayivi ña íin Ndióxi cán cája cáhnu ini a sahá cuachi na. Ta mé táto Ndióxi cán ndícaa ndixi a cándójó a jata arca. Joo a cúu ndicani chága yo sahá ña yóho viti. ⁶Já nasahin tiahva tóco ndihi ñaha veñuhu. Ta ndijáá ní quivi nandihvi jutú cuarto nu cuítí cán cája ndívi na ñaha caja cáhnu na Ndióxi. ⁷Joo in tañu tá nu cuía in túhún da cúu jutú sacuahá naquihvi da cuarto maá cán. Ta ñéhe da nii quíti ña joco da nu Ndióxi sahá cuachi mé dá xihín sahá cuachi ñayivi. ⁸Ta xihín ña yóho jánahá ínima yíi Ndióxi nu yo ña a cuú ndihvi ndá ñayivi nacuu cuarto maá nuú yíi ndivaha jáchi sa íin va cuarto

nu cuítí. ⁹Ta tóco ndihi ña yóho cúu á tátuhun yuhú nuu nuú ña íin tiempo viti. Ta sa xíní yo ña a cuú ndaja víí ñayivi ínima ná xihín ña jóco na nu Ndióxi tá sáhní na quítí ña quiahva na nii rí nu mé á. ¹⁰Jáchí tóco ndihi ña nacaja na cán nasacuu a cuéntá ña sáxí na xihín ña xíhi na ta nasacuu a cuéntá ndaja nandaja víí na mé ná xihín ticuítí. Joo já nanditahan cája na janda quiahva tandaa quívi ndijama Ndióxi tóco ndihi ñaha jáchi a cúu ndaja víí na ínima ná xihín ña yóho.

¹¹Ta ndaja coo naquixi Jesucristo ñuyíví yóho ta nanduu a jutú, da sacuahá chága nu yo. Naquixi a ña ná quiahva mé á ña vaha Ndióxi nu yo. Joo viti íin a indiví cája chúun a tátuhun jutú veñuhu ña vaha chága cán. Cúu á veñuhu ña coó nacavaha ñayivi ta co cúu á ñaha ñuyíví. ¹²In tañu cuití va nandihvi a nuú yíi ndivaha ta coó nasañehe a níí tijúhu ni níí chélo ña jóco a nu Ndióxi. Nii mé á cúu dó naxita ndica crúxu saha yo ña ná cacu ndaa ínima yo anda ama cáa quívi. ¹³Jihna nacaja ñayivi ña nacachi ley Moisés ta nu yiquí cuñu na naxihnu ndaa jutú níí tindiquí á níí tijúhu ta naxihnu ndaa rí da na xihín yaa chélo, rí nasahmi na nu náa. Ta xihín ña yóho nandivií yiquí cuñu na nu Ndióxi. ¹⁴Joo ndíyahvi chága nii Jesucristo a juú ga nii quítí. Jáchí tá naxihí Jesucristo já nandivií ínima yo já ná a cája ga yo ña co ndíyahvi cán ta ná caja í tóco ndihí ña cúní Ndióxi. Nacaja ínima yíi Ndióxi, mé a tácu a anda ama cáa quívi ña ná ndiquiahva Jesucristo mé á ndáha Ndióxi já naxihí a ndica crúxu saha cuachí vatí coó toho cuachi mé á.

¹⁵Ta sahá tuhun saá nasahan Ndióxi nu yo sahá ña cán queá cáhan Jesucristo xoo mí nu Ndióxi. Ta sahá ña nacaja Jesucristo tá naxihí a ndica crúxu cája cáhnu ini Ndióxi sahá cuachi nacaja í tá nasandico yó ley Moisés. Ta nandacaxi Ndióxi ñayivi, na cúní candúsa mé á já ná ndiquehe na ña vaha Ndióxi ña a ndíhi toho saha jáchi já cáa tuhun nasahan Ndióxi nu ná. ¹⁶Cúu á tátuhun tá cávaha in dataa tutu cuéntá ña ñehe táhvi ná candoo ñaha nu ná. Joo xíní núhú candaa ini na ña mé a ndaa naxihí da jándacoo ñaha cán anda jáví ndíyahvi mé tutu cán. ¹⁷Jáchí nani tácu da co ndíyahvi toho tutu nacavaha da sahá ñaha ndicoo táhvi da. Janda quiahva ná quívi da já ndíyahvi a. ¹⁸Ña cán queá tá nu cuítí nasahan Ndióxi tuhun a nuú ñayivi nacaja mé á ña ná quívi quítí ta xihín nii rí cán nandoo cuachi ñayivi. ¹⁹Jáchí tá nandihí nacahan Moisés ley nasahan Ndióxi nuú ñayivi Israel já natiin da in yíto, dó naní hisopo ta nacató da loho cachi cuahá nu do. Ta nachindaxi da dó cán xihín níí chélo xihín níí tijúhu, dó nacava táhan xihín ticuítí. Ta naxihnu ndaa da do nu libro nu ndaa ley Moisés. Ta naxihnu ndaa da dó nuú ñayivi Israel. ²⁰Anda já nacachi da já xihín na Israel: “Xihín níí quítí yóho jáxinu coo Ndióxi tuhun a ña nasahnda nu ndó caja ndó”, nacachi Moisés. ²¹Ta quiahva já naxihnu ndaa Moisés níí quítí

nuú veñuhu níi quítí xihín nuú tóco ndihi ñaha ñúhu cán ña caja chúun na caja cáhnu na Ndióxi. ²²Jáchí cáchí ley Moisés ña xihín níi cuití va ndivií ndaja táhan ñaha, vatí a juú ndihi a. Ta janda quiahva ná cuita níi já cuu caja cáhnu ini Ndióxi sahá cuachi ñayivi.

Nandoo cuachí xihín níi Jesucristo

²³Sahá ña cán quéa nanditahan nu Moisés ndaja vií da ñaha veñuhu ñuyiví yóho xihín níi quítí. Ta mé ñaha cán cúu á yuhú nuu ña íin indiví. Joo ñaha íin indiví ndivií a xihín níi, dó vaha chága a juú ga níi quítí. ²⁴Ta veñuhu ñuyiví cúu á yuhú nuu cuití va ña íin indiví. Coó nandihvi Jesucristo nuú yíi ndivaha veñuhu, ña nacavaha ñayivi. Joo nandihvi mé á indiví ta cán íin a viti ta cáhan mé á xoo mí nu Ndióxi. ²⁵Jáchí da cúu jutú sacuaha nandihvi da tá nu cuía nuú yíi ndivaha veñuhu joco da níi quítí nu Ndióxi. Joo ña nacaja Jesucristo quéa nandiquiahva a mé á quivi a saha yo ta in tañu cuití va naxita níi á ndica crúxu. ²⁶Jáchí tá ná nditahan nuú Jesucristo quivi a cuahá tañu já quéa janda mé saha tá nacava sahá saha ñuyiví casahá quivi a, nduu. Joo a juú a já jáchí tá jalóho cúní ndihi saha tiempo viti já nacasa Jesucristo ñuyiví yóho ta in tañu cuití va naxihí a sahá cuachi ñayivi. ²⁷Quiahva já yáha xihín ñayivi jáchí in tálaa tañu quivi na ta anda jáví ndítahan candichi na nu Ndióxi caja vií mé á sahá ña nacaja na tá nasanduu na ñuyiví yóho. ²⁸Ta quiahva já in tañu cuití va naxihí Jesucristo ndica crúxu jándoo a cuachi cuahá ñayivi. Ta tandaa quivi quixi tucu mé á ñuyiví yóho joo a quíví ga ña jáchí quixi a ndiquehe a na ndátí tiahva cuhun coo xihín mé á indiví.

10 Ta mé leynacahyí Moisés yóho nasacuu a tátuhun in candahvi mé ña ndaa ña coo chága chínuu. Nasacuu a yuhú nuu uun ña vaha ña vaxi nu yo. Jáchí mé ley yóho coó nacuu caja ndaja vií a ínima ñayivi vatí ná cayati na nu Ndióxi tá nu cuía sá sáhní na quítí joco na nu Ndióxi. ²Jáchí tá ná cuu ndivií ínima ná sahá ña caja na ña cáchí ley Moisés já quéa in tañu cuití va joco na níi quítí nu Ndióxi, nduu. Ta xihín ña yóho ndoo cuachi na ta a ndícani ga ini na sahá cuachi na, nduu. ³Joo tá nu cuía tá sá sáhní na quítí joco na níi rí nu Ndióxi já quéa ndicuhun ini na ña cómí na cuachi nu Ndióxi. ⁴Jáchí a cuú jándoo na cuachi na xihín níi tindiquí á xihín níi tijúhu.

⁵Ña cán quéa tá jalóho cúní casaa Jesucristo ñuyiví yóho já nacachi a já xihín Ndióxi, tátá a:

Có cúní ndó ña ná cahní ñayivi quítí joco na rí nu ndo ta ni có cúní ndo ña ná joco na java ga ñaha nu ndo.

Sahá ña cán quéa nasahan ndó in yiquí cuñu nuú i já ná ndiquiahva i ña nu ndo.

⁶Co cájii ini ndó tá ná cahmi na quítí nū náa joco na rí nū ndo. Ta ni co táhán ini ndó tá ná joco na java ga ñaha nū ndo ña ná jándoo na cuachi na.

⁷Sahá ña cán quéa já nacachi i já xihín ndo:

“Tátá Ndióxi, yóho íin i ta íin tiahva vi caja i ndá ña nacuu cúni ndo.

Jáchí quiahva já ndáa ini tūhun mé ndó sahá i”, nacachi Jesucristo.

⁸Nu cuítí nacachi Jesucristo ña co cúni Ndióxi ña ná cahní ñayivi quítí quiahva na nī rí nū á. Ta ni co táhán ini a tá ná cahmi na quítí nū náa ña ná ndivií ínima ná. Ta nacachi a ña yóho vatí sáhndá ley Moisés caja ñayivi já. ⁹Joo tá nandihí nacachi Jesucristo já xihín Ndióxi: “Yóho íin i ta íin tiahva vi caja i ndá ña nacuu cúni ndo”, nacachi a. Ña cán quéa nasacu xoo Ndióxi ña nacaja na jihna ta viti ndíquehe vaha mé á ñayivi sahá ña naxihí Jesucristo ndica crúxu. ¹⁰Nacaja Jesucristo ña nasacu ini Ndióxi caja sahá ña cán quéa nacandoo vií uun tóco ndihí mí jáchí in tálaa tañu nandiquiahva Jesucristo yiquí cuñu a tá naxihí a sahá cuachí.

¹¹Jihna ga ña nacaja ndihí jutū cúú á ña nini quiví sándita da nū náa jóco da quítí nū Ndióxi. Ta vatí cuahá tañu sá cája da já joo a cuú jándoo da cuachi ñayivi xihín ña yóho. ¹²Joo in tañu cuítí va naxihí Jesucristo sahá cuachi tóco ndihí ñayivi já ná cuu cacu ndaa ínima ná anda ama cáa quiví. Anda jáví nasacoo a xoo cuáha Ndióxi, tátá a indiví. ¹³Ta cán íin coo a viti cándati a janda quiahva ná cacu Ndióxi na cándají mé á tixi sahá.

¹⁴Jáchí in tálaa tañu naxihí Jesucristo ndica crúxu ta xihín ña yóho nandaja vií a ínima ñayivi, na nacaxi mé á. ¹⁵Ta sa xíní yo ña cúú ña yóho ña ndaa jáchí já cáchí ínima yīi Ndióxi já:

¹⁶Vaxi quiví tá quiahva i tūhun saá nuú ñayivi Israel ta quiahva johó coo a.

Caja i ña ná candaa vaha ini na ley mí i ta caja i ña cañuhu a ini ínima ná.

¹⁷Ta já cáchí tucu a já:

Caja cáhnu ini i sahá ndaja táhan ña núu nacaja na ta a ndícuhun ga ini i sahá cuachi na, cáchí tūhun Ndióxi.

¹⁸Ta sahá ña nacaja cáhnu ini Ndióxi sahá cuachi ñayivi sahá ña cán quéa co xíní núhú ga cahní na quítí ña joco na rí nū mé á sahá cuachi na.

Xíní núhú cayatí nū Ndióxi

¹⁹Candehé ndo, ñani i, na cúú cuéntá Jesús. A cáyihví toho í viti ndihví nū íin Ndióxi, mé nuú yīi ndivaha jáchí naxihí Jesucristo sahá cuachí. ²⁰Ta tá nandiquiahva mé á yiquí cuñu a já naxihí a ta xihín ña yóho nasuná a íchí saá já ná cuu cayatí nū íin mé á. ²¹Ta mé Jesús cúú á jutū sacuahá

sahá yō nū Ndióxi jáchi cómi a cuéntá sahá ndihí, nā cúú cuéntá mé á. ²²Ñā cán quēā xíní ñúhú cayatí nū íin Ndióxi xihín ndinuhu iní jáchi cándeé iní mé á. Cúú á tátuhun nandoo yiquí cuñu í tá naxihí Jesucristo ndica crúxu. Ta viti cō ndítahan ndicani iní sahá cuachi nacaja í jáchi najándoo mé á cuachí. ²³A jándacoo í ñā cándeé iní Ndióxi ta ná candati tiaha í janda ná yaha ñā cáchí mé á jáchi xíní vaha í ñā jáxinu cōo Ndióxi tuhun nasahan nū yō. ²⁴Ta ndítahan nū yō ndinducú yō ndaja caja í chindeé táhan í já ná quihví chága iní ñani táhan í. Ta ndítahan caja chága yó ñā vaha. ²⁵Cō ndítahan toho caja í tá quiahva cája java nā cúú cuéntá Jesús, nā cō cūni nditaca xihín ndihi java ga nā cúú cuéntá Jesús. Ñā ndítahan caja í quēā jácahan chága táhan í ñā ná taca í xihín java ga nā cúú cuéntá Jesús jáchi sa xíní yō ñā vaxi quiví quixi tucu Jesucristo ñuyiví yóho.

²⁶Tá sa cándaa vaha iní ñā cō ndítahan caja í cuachi ta chínee tucú mí cuahan í cája í cuachi vatí sa cándaa iní ñā ndaa, a cuú ga ndoo cuachí nū Ndióxi. ²⁷Ta cáyihví yō candatí janda quiahva ndoho ndivaha iní caja Ndióxi. Jáchi jácana mé á ñayivi nū ñúhu cáyi ita, mé nū ndihi sahá nā ihví mé á. ²⁸Jáchi ndá nā Israel, nā cō cūni caja ñā sáhdá ley Moisés já quēā ndítahan quivi na tá ná cacu iví á uní testigo sahá nā nū juéxe. Ta ni in na a cándahví ini ñahá. ²⁹Joo ndaja ga ví ndítahan ndoho ini nā quéhe núu Jesús, mé in túhún jini já jahyi Ndióxi. Jáchi cúú á tátuhun sáni nihni na a ta cō sáhní toho na mé ná ñā naxihí a jándoo a cuachi na tá quiahva nasahan Ndióxi tuhun a caja. Cánahá nā xihín ínima yii Ndióxi, mé a cája cuahá ñamani xoho. ³⁰Cándaā vaha iní yō cúú mé a nacachi ñā yóho: “Yehe jándoho i ini ñayivi, nā cája cuachi. Ta caja i ñā ná chahví na sahá cuachi na”, cáchí a. Ta já cáchí tucu Ndióxi, xitoho í já: “Yehe caja ví i sahá nā cúú cuéntá mí i”, cáchí a. ³¹Mé a ndaa ndáhví nahá nacuu tá ná tiin Ndióxi mí ñā ná chahví sahá cuachí jáchi mé á cúú á Ndióxi, ñā tácu indiví.

³²Ndítahan ndicuhun ini ndó ñā nayaha tá jacá nacandeé ini ndó Jesús. Vatí nandoho ndivaha ini ndó nacaja java ñayivi joo nasahan ndeé ini ndó. ³³Java tañu nasacu ndaa ichi nā ndohó nuú ñayivi ta java tañu nacaja xixi na xihín ndo ta java tañu nacatáhan ndó xihín java ga nā tá nandoho ri ini na sahá Jesús. ³⁴Ta táhnda ini ndó sahá nā cúú cuéntá Jesús ñúhu vecaa. Ta cōo nacahan cuachí ndo ta janda cájii ini ndó vatí nacaja cuíhná na ñaha ndó jáchi cándaā vaha ini ndó ñā cómi ndó ñā vaha chága indiví ta a ndíhi toho sahá ñā cán. ³⁵Ñā cán quēā a jándacoo ndó ñā cándeé ini ndó Jesús jáchi tandaa quiví quiahva cuahá Ndióxi ñā vaha nū ndo tá cándeé ini ndó mé á. ³⁶Ndítahan nū ndó quiahva ndeé ini ndó caja ndó ñā cūni

Ndióxi já quéa ndiquehe ndó ña vaha nasahan mé á tuhun a quiahva nu ndo. ³⁷Jáchí já cáchí tuhun Ndióxi já:

Jalóho cúni ta já quixi mé a ndítahan nuu quixi ta a cáyáncá toho a.

³⁸Joo ndá na cúu ñayivi ndaa nu mí i catacu na sahá ña cándéé ini na yehe.

Ta tá co cúni ga na cándéé ini na yehe ta já ndicó coo na caja na cuachi já quéa a cájii iní i xihín ná, já cáchí Ndióxi.

³⁹Joo a cája toho í tá quiahva cája java ñayivi jáchi co cúni na cándéé ga ini na Jesús ta tandaa quivi cuhun na indayá. Joo mí cúu yó na cándéé iní Jesús ta tandaa quivi coo í nu in mé á.

Ndítahan nu yó cándéé iní Ndióxi

11 Tá ná cándéé iní Ndióxi já quéa cúni cachi a ña sa xini vaha í ña yaha tá yaha ña ndátí yó yaha. Ta vatí co xini yó ña ndátí joo cándéé iní ña já coo. ²Jáchí sahá ña nacandéé ini tásáhnú jícó yo Ndióxi sanahá ndivaha sahá ña cán quéa cájii ini Ndióxi xihín ná.

³Ta sahá ña cándéé iní Ndióxi sahá ña cán quéa cándaa vaha iní ña nacahan Ndióxi ta já nacavaha mé á ñuyiví xihín indiví. Jihna coo nasahin ni in ñaha joo viti náha nuú ña nacavaha mé á.

⁴Ta sahá ña nacandéé ini da naní Abel Ndióxi sahá ña cán quéa natahan ini Ndióxi xihín ña nacaja da tá najocó da ñaha nu á. Ta coo natahan ini a xihín ña najocó da naní Caín, da cúu ñani Abel jáchi coo nacandéé ini Caín mé á. Sahá ña cán quéa ndiquehe Ndióxi ña najoco Abel nu á ta xihín ña yóho nduu da da ndaa nu á. Ta vatí naxihi Abel joo xihín ña nacaja da sanahá jánaha da nu yo ndaja ndítahan nu yó cándéé iní Ndióxi.

⁵Ta sahá ña nacandéé ini da naní Enoc Ndióxi sahá ña cán quéa coo naxihi toho da. Joo nasanehe Ndióxi da indiví ta coo nacuu ndinehé ñayivi mé dá jáchi ndaa da cuahan da indiví nacaja Ndióxi. Ta cáchí tuhun Ndióxi já nacaja mé á jáchi táhán ini a xihín ña nacaja Enoc nani nasahin da ñuyiví yóho. ⁶Tá co cándéé iní Ndióxi já quéa co táhán ini Ndióxi xoho. Jáchí ndá na cúni cayati nu Ndióxi xini ñuhú cándúsa na ña in mé á indiví ta xini ñuhú cándúsa na ña quiahva mé á ña vaha nuú ñayivi tá ndinducú na mé á.

⁷Ta sahá ña nacandéé ini da naní Noé Ndióxi sahá ña cán quéa nataa johó da tá nacaxi tuhun Ndióxi xihín dá ña ndoho ini ñayivi chága chí nuu vatí coo nasahá nu á. Nacandúsa Noé Ndióxi ta chí nacasáhá da cávaha da in barco cáhnú nuú cuu cacu ndaa mé dá xihín na vehe da. Ta sahá ña nacandéé ini da Ndióxi sahá ña cán quéa nduu da taa ndaa nu mé á. Ta xihín ña nacaja da najácojo da cuachi jatá ñayivi ñuyiví jáchi náha cáxi a ña coo nacandúsa na caja na ña cáchí Ndióxi.

⁸Ta sahá ña ñacandeeé ini da naní Abraham Ndióxi sahá ña cán queá ñacandúsa da ña ñacahan Ndióxi xihín dá. Ta chí ñaquee da ñuu da ta cuahan da in ñundáhyi, ña ñasahan Ndióxi tuhun a quiahva nu dá. Najándacoo da ñuu da vatí coó ñasaxíni da ndaja naní mé ñuu nuú cūhun da. ⁹Ta sahá ña cāndeeé ini Abraham Ndióxi sahá ña cán queá ñaxinu coo da ñundáhyi ña ñasahan Ndióxi tuhun a quiahva nu dá. Joo nandíñehe dá java ñayivi ndúu cán chí ñasahíin da tá quiahva ndúu ña tóho. Vehe tienda ñasahíin da xihín ña vehe da. Ta quiahva já ñasahíin Isaac xihín Jacob jáchi ñasahan Ndióxi tuhun a nu mé dá xihín nuú ña vehe da. ¹⁰Ñacaja Abraham ña yóho jáchi ndátí da coo da in ñuu ña íin indiví, ña ñacavaha Ndióxi nuú coo a anda ama cáa quivi.

¹¹Ta jári ñacandeeé ini Sara, mé ñájíhí Abraham Ndióxi sahá ña cán queá ñacaja Ndióxi ña ñacuu quee jahyi ñá vatí sa ñacayatá ña. Ta tá nandíhi já ñacacu jahyi ñá ta ñasacuu a sahá ña ñacandeeé ini ñá jáxinu coo Ndióxi tuhun ñasahan nu ña. ¹²Sahá ña cán queá vatí ñacayatá ndivaha Abraham ta ñacayati quiví quivi da joo ñacacu jahyi da xihín ña ta ñanduu da tásáhnú jícó ña Israel. Ta cuahá ndivaha na cúu chichi da janda a cuú candahvi na. Cúu á tátuhun quimi ña íin indiví á tátuhun ñutí yuhú tañuhú jáchi a cuú candahvi a.

¹³Tóco ndíhi ña ñaquixi chichi Abraham yóho vatí ñaxihí ña joo ñacandeeé tá ñacandeeé ini na Ndióxi. Ta vatí coó ñaxini na ña ñasahan mé á tuhun a quiahva nu ná joo ñasacuu a tátuhun ñaxini na ña. Jáchi ñacandeeé ini na ña ñacachi Ndióxi xihín ná ta ñacajii íni ña. Ña cán queá ñacachi na ña ndúu tóo cuití ña ñuyíví yóho ta cúu ná tátuhun ña tóho jáchi coó ñuu na ñuyíví yóho. ¹⁴Cāndaa íni ña ndá ña cáchí já cúni cachi a ña ndinducú ña inga ñuu nuú canduu na. ¹⁵Ta coó ñatahnda ini na sahá ñuu ñaquee na cán jáchi cuu ndicó coo na, nduu joo coó ñacacúni na caja na ña. ¹⁶Joo ña ndúcú ña cúu in ñuu ña vaha chága, ña íin indiví. Ta ñacaja tiahva Ndióxi mé ñuu indiví nuú cuu coo na já queá a cácahan nuu mé á cachi a ña cúu ná cuéntá mé á.

¹⁷Ta sahá ña ñacandeeé ini Abraham Ndióxi sahá ña cán queá ñasahíin tiahva da cahní da Isaac, jahyi da joco ñahá da nu Ndióxi tá ñaxito ndojó Ndióxi da. Já ñacaja Abraham vatí ñasahíin in túhún jini jahyi da ta sa ñasahan Ndióxi tuhun a nu Abraham ¹⁸tá ñacachi a já xihín dá: “Cacu jahyún, da cananí Isaac ta xihín da cán ndicuhá ndivaha chichún chága chí nuu”, ñacachi Ndióxi. ¹⁹Sa ñacandaa vaha ini Abraham ña cuu caja Ndióxi ña ná nditacu tucu Isaac tá sa ñaxihí da. Ta vatí coó ñasahní toho Abraham Isaac joo cúu á tátuhun ñaxihí da ta ñanditacu tucu da jáchi ñasahíin tiahva da cahní da sahá ña ñacandeeé ini da Ndióxi.

²⁰Ta sahá ña ñacandeeé ini Isaac Ndióxi sahá ña cán quéea nasahan da tuhun da nu ndívi jahyi da, da naní Jacob xihín da naní Esaú ña caja cuaha Ndióxi ñamani xihín ndívi da chága chí nuu. ²¹Ta sahá ña ñacandeeé ini Jacob Ndióxi sahá ña cán quéea tá jalóho cúni quivi da já quéea nacachi da ña caja cuaha Ndióxi ñamani xihín ivi jahyi nání da, da cúu jahyi da naní José. Anda jávi ñacaja cáhnu da Ndióxi nani tীন ndaa da garrote da. ²²Ta sahá ña ñacandeeé ini José Ndióxi sahá ña cán quéea tá jalóho cúni quivi da nahān da xihín na Israel sahá mé quivi tá ná quee na nación Egipto cuhun na. Ta nahānda da chuun nu ná ña ná cañehe na lasa yiquí cuñu mé dá cuhun ña xihín ná.

²³Ta sahá ña ñacandeeé ini náná tátá Moisés Ndióxi sahá ña cán quéea tá nandíhi nacacu da já nachicaan jehé na da tañu uni yoo. Náha ña cúu dá in lee núchí ndivaha ta chí coó nayihví toho na tuhun nahān rey cán tá nahānda da chuun ña quivi ndíhi tavalí jacá nacacu nuu na Israel. ²⁴Ta sahá ña ñacandeeé ini Moisés Ndióxi sahá ña cán quéea tá nahānu da najándacoo da vehe rey Egipto vatí najácuahnu ña cúu jahyi jíhí rey cán da tátuhun jahyi ná. ²⁵Ta ña ñacaja da quéea nahān da nandoho ini da xihín na cúu cuéntá Ndióxi. Jáchí co cúni da cáji ini da cája da cuachi vatí chá tiempo. ²⁶Ta nahān da ña vaha chága ná ndoho ini da saha Jesucristo, mé a chindahá Ndióxi cacomí cuéntá sahá ñayivi a juú ga ña ná cacomí da cuahá ñaha cuicá nación Egipto cán. Jáchí nahāvi ini da sahá ñamani caja Ndióxi xihín da chága chí nuu. ²⁷Ta sahá ña ñacandeeé ini Moisés Ndióxi sahá ña cán quéea najándacoo da nación Egipto ta coó nayihví da ña ná ndicuehe rey Egipto cán xihín dá. Ta nahān ndeeé ini da jáchí nahāca da tátuhun in da xíca xihín Ndióxi vatí coó nahāni da mé á.

²⁸Ta sahá ña ñacandeeé ini Moisés Ndióxi sahá ña cán quéea nahānda da chuun ña ná caja na Israel vicó pascua. Nahānda da chuun ña ná cahní na ndicachi ta já cuihna ndaa na níi rí yuyéhé vehe na Israel ña ná a quiví jahyi taa na, da nacacu nu cuítí tá ná yaha táto Ndióxi, mé a cája ña ná quivi ñayivi. ²⁹Ta sahá ña ñacandeeé ini na Israel Ndióxi sahá ña cán quéea nahāha na mahnú ndaa tañuhú naní tañuhú cuahá. Nahācuu a tátuhun xíca na nu ñundáhyi íchí uun. Joo tá nahāhá na Egipto yaha na mé tañuhú cán já quéea coó nahācuu caja na ña. Nahānda na ini ticuí ta já nahāhi ndíhi na.

³⁰Ta sahá ña ñacandeeé ini na Israel Ndióxi sahá ña cán quéea nahācuu na ñuu Jericó tañu usa quivi ta já nahācuu ndíhi náma ñuu cán. ³¹Ta sahá ña ñacandeeé ini ná xíca jii naní Rahab cán Ndióxi sahá ña cán quéea coó nahāhi ná xihín ndíhi ñayivi ñuu Jericó, na coó nahāndúsa Ndióxi. Nahācuu Ndióxi Rahab cán jáchí sa nandiquehe vaha ná java taa Israel tá nahāsa da nu cuítí sándehe da ñuu cán.

³²Ndá chága cahan i xihín ndo. Sa nacahan cuahá i xihín ndo joo cámani cahan i sahá da naní Gedeón xihín da naní Barac xihín da naní Sansón xihín da naní Jefté xihín da naní David xihín da naní Samuel xihín java ga na nasacuu profeta. ³³Sahá ña nacandeeé ini na cán Ndióxi sahá ña cán queá naquee vaha na tá nacani táhan na xihín java nación ta nasacomí vaha na cuéntá sahá ñayivi ta nandiquehe na ña vaha nasahan Ndióxi tuhun a quiahva nu ná. Java na nachicaji na yúhu león. ³⁴Ta java na nandahva na núhu cáyi ña ná a cáyi toho na. Ta java na nacacu na ndahá ñayivi, na nacacúni cahní ñahá xihín machiti. Ta java na vatí vitá ini na joo nandihvi ndee ná. Ta java na naquee vaha na tá nacani táhan na xihín na ihvi na. ³⁵Ta java najihí nacandeeé ini na Ndióxi ta sahá ña cán queá naxini na ña nanditacu tucu na vehe na nacaja Ndióxi.

Joo java na nandoho ndivaha ini na janda quiahva naxihí na. Ta coó nacandúsa na cacu xoo na Ndióxi jáchi nacandaa vaha ini na ña cuhun na coo na in ñuu vaha chága nu íin mé á. ³⁶Java na nandoho ini na tá nasacu ndaa ichi ñahá na ta nacani ñahá na. Ta java na nasandico na xihín cadena ta nachicaan na na vecaa. ³⁷Ta java na naxihí na jáchi nacuun ñayivi yuu ná ta java na naxihí na tá nasahnda túhun ñahá na. Ta java na naxito ndojó ñayivi na ña ná caja na cuachi. Ta java na naxihí xihín machiti. Ta java na nasandíxi na xihín ní ndicachi xihín ní tijúhu cuití va jáchi coó toho jiuhún na. Nacaja xixi ñayivi xihín ná ta najándoho na ini na. ³⁸Naxica ndáhví na nu íchí ndivaha ta naxica nuu na yucú núhu ta nasanduu na tixi cáva xihín yávi nu núhu. Mé a ndaa cúu ná ñayivi vaha ndivaha ta co ndítahan nu ná ndoho ini na ñuyíví yóho. ³⁹Ta cájii ini Ndióxi xihín tóco ndihi na cán jáchi nacandeeé ini na mé á. Joo cámani ndiquehe na ña nasahan mé á tuhun a quiahva nu ná. ⁴⁰Jáchi cúni Ndióxi ña ná candati na cán anda tandaa quiví ndiquehe tóco ndihí ña vaha chága quiahva Ndióxi nu yo.

Ná candeeé iní Jesús cuití va

12 Mé ñayivi cuaha cán naquee vaha na jáchi nacandeeé ini na Ndióxi. Ta jánaha na nu yo ndaja caja í ña ná quiahva ndeeé iní tá ná ndoho iní. Ña cán queá ná jándacoo í tóco ndihi cuachi cája í, ña tñin tuun mí. Ta ná jácaxoo í tóco ndihi ña sáji nuu nu yo caja í ña cúni Ndióxi. Ta ná candico yó íchí Ndióxi xihín ndinuhu iní tá quiahva ndítahan caja í. ²Ta ná candehé cáxi yo nuu Jesús jáchi mé á cán cája ña ná casáhá candeeé iní Ndióxi ta cája ña ná candeeé iní mé á anda tandaa quiví quiví. Nandoho ini Jesús tá naxihí a ndica crúxu ta coó nacacahan nuu á vatí cácahan nuu ñayivi quivi na quiahva já. Jáchi nacandaa ini a ña tá ná ndihi ndoho ini a

já tandaa quiví cají ndivaha ini a. Ta viti íin coo a xoo cuáha Ndióxi indiví.

³Xíní ñúhú ndicuhun ini ndó ndaja nacaja Jesús jáchi a juú quiahva nandoho ini a ndahá ñayivi cája cuachi. Sahá ña cán quéa a jándacoo ndó ña cándeé ini ndó Jesús ta a cácuitá ínimá ndó tá ndóho ini ndó. ⁴Jáchi cámani yí va cahní na cája cuachi ndohó sahá ña co xeén ndó caja ndó cuachi. ⁵Á nandindójó ndó tuhun nacahan Ndióxi xihín ndo sahá ña cúu ndó jahyi mé á. Já cáchí tuhun Ndióxi já:

Jahyi maní i, a quéhe núu ndó Ndióxi tá jándoho a ini ndó ña ná ndacaca vaha ndó.

Ta a cáva iví johó ini ndó tá jánani mé á ndohó.

⁶Jáchi já cája Ndióxi xihín na quíhvi ini a.

Jándoho a ini na já ná jándacoo na ña núu ta já nduu na jahyi mé á, cáchí tuhun Ndióxi.

⁷Quiahva ndeé ini ndó tá cája Ndióxi ña ná ndoho ini ndó. Jáchi tá quiahva cája in da taa xihín jahyi da quiahva já cája mé á xihín ndo. Jáchi tóco ndihi dataa jácaxáhan da jahyi da já ná ndacaca vaha da. ⁸Ta tá co jándoho Ndióxi ini ndó já quéa co cúu ndó jahyi mé á. Cúu ndó tátuhun jahyi ndáhví na. Joo tá ná jándoho Ndióxi ini ndó já cándaá ini ndó ña mé a ndaa cúu ndó jahyi mé á. ⁹Tá nasacuú na valí nacaja cáhnu yó tátá yo vatí najácaxáhan na mí. Joo íin chága saha caja cáhnu í Ndióxi, tátá yo, mé á íin indiví vatí jándoho a ini mí jáchi xihín ña yóho cuu coo í xihín mé á anda ama cáa quiví. ¹⁰Tá valí yo najándacaca vaha tátá yo mí tá najánani na mí jáchi já vaha xíní na vatí mé ñuyíví yóho cúu á nu ndúu tóo cuití ví. Joo tá jánani Ndióxi, tátá yo, mí cúu á ña vaha chága jáchi xihín ña yóho ndaja yí á mí tá quiahva íin yí mé á. ¹¹Mé a ndaa co táhán iní tá jánani na mí jáchi cáhíhvi yo xihín á. Joo tá nandihí já coo vaha iní jáchi nacatiahva í ndaja caca vaha í sahá ña nandoho iní ta xihín ña yóho cacuú ñayivi ndaa nu mé á.

Ndítahan nu yó táa johó í nu cáhan Ndióxi

¹²Ña cán quéa ndicuítá ndó ta a jándacoo ndó mé ndó. ¹³Ta ndinducú ndó ichí ndacú já ná cuu chindeé ndó ñayivi, na cáva iví johó ini ña ná a ndíco coo na nuú cuachi.

¹⁴Xíní ñúhú ndinducú ndó ndaja caja ndó coo vaha ini ndó xihín tóco ndihí ñayivi. Jándacoo ndó cuachi cája ndó ta ndinuhu ini ndó caja ndó ña cúni Ndióxi já ná cuu coo ndó nu íin mé á. ¹⁵Cuéntá coo ndó ná a jándacoo ni in ndó íchí cuéntá Ndióxi jáchi cúni a caja cuahá ñamani xihín ndo. Cuéntá coo ndó ná a cácuu ndó tátuhun in yucu ova ña játiví ña xíxi na jáchi na cája cuachi cája quini na ta játiví na java ga na cúu cuéntá

Ndióxi. ¹⁶Coto a quíhvi nuu ndó coo ndó xihín in na co cúu yíi ndo á ñájíhí ndo. Coto a quéhe núu ndó ñaha Ndióxi tá quiahva nacaja Esaú. Jáchi in quívi cuíco ndivaha da ta najicó da tóco ndihi ñaha ndítahan ndiquehe da nu tátá da sahá ña ná cuxu da in cohó cuití va. ¹⁷Joo cándaa iní ña tá nandindaa nuu dá ndiquehe da ñaha ndáha tátá da coo nacuu ndiquehe da ni in ñaha. Jáchi najicó da ña nuú ñani da sahá ña ná cuxu da in cohó. Ta vatí nasacu ndivaha da joo coo nacuu caja da ndijama da tuhun da ña sa nasahan da nuú ñani da.

¹⁸Ta mé ndó coo nacayati ndó nu Ndióxi tá quiahva nacaja na Israel sanahá. Mé na cán nataca na saha in yucu naní Sinaí xihín da naní Moisés. Ta nacayi núhu cán ta nanaá ndivaha ta naxicó ndivaha tachi naxini na.

¹⁹Ta naxini johó na nativi trompeta ta nacahan Ndióxi xihín ná. A juú quiahva nayihví na tá naxini johó na nu cáhan Ndióxi chí naxica tahví na nu á ña ná a cáhan ga xihín ná. ²⁰Jáchi coo nacandee ini na táa johó na ña sáhná Ndióxi nu ná tá nacachi a já: “Tá ná caní ndaa in ñayivi á in quítí yucu Sinaí yóho já quea xíní núhú cuun ndó yuu ná á tuxú ndó na xihín póyá anda ná quívi na”, cáchí Ndióxi. ²¹Ta a juú quiahva nayihví na sahá ña naxini na cán. Ta anda Moisés viti nayihví ndivaha da ta já nacachi da já: “Quíji ninu i xihín ña yíhvi i”, cáchí da.

²²Joo ña nacaja mé ndó quea sa nacayati ndó in nuú naní Sión, mé nu íin Ndióxi, mé a tácu indiví. Mé ñuu cán cúu á tátuhun inga Jerusalén, ña íin indiví ta ndúu cuaha mil táto Ndióxi cán. ²³Sa nataca ndó cán caja cáhnu ndó Ndióxi xihín tóco ndihi ñayivi, na mé a ndaa cúu jahyi Ndióxi, mé na ndaa quívi nu libro Ndióxi indiví. Ta sa nacasaa ndó nu Ndióxi, mé a cája víi saha tóco ndihi ñayivi. Ta nataca ndó xihín tóco ndihi ñayivi, na sa naxihí sanahá, mé na sa nanduu ndaa nu Ndióxi nacaja mé á. ²⁴Ta sa nacayati ndó nuú Jesús, mé a cáhan xoo mí nu Ndióxi. Jáchi sahá ña nacaja Jesús tá naxita nii á ndica cruxu sahá ña cán quea nasahan Ndióxi tuhun a nu yo ña ná ndoo cuachí. Joo jiin va nacaja Ndióxi tá naxita nii Abel sanahá ndivaha jáchi najándoho a ini ñani da, da naní Caín sahá ña nasahní ñahá da.

²⁵Cuénta coo ndó já ná a quéhe núu ndó nu cáhan Ndióxi xihín yo. Jáchi ñayivi cán, na coo naxeen cája ña cáchí Ndióxi nachahvi na sahá ña núu nacaja na mé ñuyíví yóho. Ta já caja ri Ndióxi xihín mí tá ná quehe núu í tuhun mé á jáchi janda indiví íin mé á cáhan xoho. ²⁶Mé tiempo cán najátaan Ndióxi ñuyíví yóho tá nacahan mé á. Joo já cáchí a já viti: “Vaxi quívi ta játaan tucu i ñuyíví ta mé tiempo cán jáquiji nuu i indiví viti”, cáchí a. ²⁷Tá nacachi Ndióxi ña inga tucu játaan mé á ñuyíví yóho já cándaa iní ña ndihi sahá ñaha nacavaha mé á. Ta tóco ndihi ñaha, ña a cuú quiji nuu, ña cán coo a anda ama cáa quívi. ²⁸Ñehe táhvi yo coo í nuú

cacomí Ndióxi cuéntá saha yo ta mé cán a cuú quiji nuu a. Sahá ña cán queá ná ndiquiahva í ndixahvi nu Ndióxi ta ná caja cáhnu í mé á xihín ndinuhu iní jáchi cáji ini mé á xihín ña yóho. ²⁹Jáchi mé a ndaa Ndióxi cúu á tátuhun ñúhu ña cáyi ña jándihi sahá ñaha. Ña cán queá caja mé á ña ná ndihi saha tóco ndihi cuachi.

Ná caja í ña táhán ini Ndióxi xihín

13 A jándacoo ndó ña quíhvi ini ndó na cúu cuéntá Jesús jáchi cúu ná tátuhun ñani ndó á quiahva ndó. ²A ndíndójó ndo ndiquehe vaha ndó na tóho tá ná casaá na vehe ndó jáchi xihín ña yóho java na nandiquehe vaha na tát Ndióxi vatí coo nacandaá ini na ña.

³A ndíndójó ndo sahá ñayivi ñúhu vecaa ta xíní ñúhú tahnda ini ndó xihín ná jáchi xíní ñúhú cacuu a tátuhun ndácaan mé ndó vecaa xihín ná. Ta a ndíndójó ndo sahá ñayivi, na cája xíxi na xihín ta xíní ñúhú tahnda ini ndó xihín ná jáchi cuu ndoho ini ri ndóhó va tá quiahva ndóho ini na cán.

⁴Vaha va cája ndó tá tándaha ndo ta xíní ñúhú caja cáhnu ndó yíi ndo á ñájíhí ndo. Ta a ndúcú toho ndó coo ndó xihín inga na jáchi jándoho Ndióxi ini ndá na quíhvi nuu coo xihín na co cúu yíi na á ñájíhí na.

⁵A ndiáva ini ndó cacomí ndó cuahá jiuhún. Ndítahan cajji ini ndó xihín ña cómi ndo jáchi já cáchí Ndióxi já: “A jándacoo toho i ndohó ta ni a ndíndójó i saha ndo”, cáchí a. ⁶Sahá ña cán queá cuu candeé iní Ndióxi ta cuu cachí já:

Mé á cúu Ndióxi, xitoho i ta chindeé a yehe.

Ta a cáyihví toho i ndá ñaha ndúcú ñayivi caja na xihín i.

⁷A ndíndójó ndo sahá na nasacomí cuéntá saha ndo ta ni sahá na nacaxi tuhun tuhun Ndióxi nu ndo. Candehé ndó ndaja nacaja na ñuyíví yóho jáchi nacandeé ini na Ndióxi anda quiahva naxihí na. Ta ndítahan nu mé ndó candeé ini ndó a tá quiahva nacaja na cán.

⁸Co ndíjama toho Jesucristo. Tá quiahva nasacuu a sanahá ndivaha quiahva já cúu ri a anda viti ta quiahva já coo a anda ama cáa quívi. ⁹A quiahva toho ndó ñamaní nuú ñayivi ña ná jándahvi na ndohó xihín ña jánaha na nu ndo. Jáchi cúu á sahá ñamaní cája Ndióxi xoho ña ndíndacú ínima yo. Ta co cúu á sahá ña jánaha java ñayivi tá cáchí na ña a cúu cuxú java ñaha ña ná nduu ndaa ínima yo. Mé a ndaa ña yóho co chindeé a mí.

¹⁰Tá naxihí Jesucristo ndica crúxu já najoco a mé á nu Ndióxi saha yo. Joo jíin va nacaja jutú cuéntá na Israel sanahá tá najoco na quítí nu Ndióxi. ¹¹Jáchi da cúu jutú sacuahá nasañehe da nii rí naxihí cán ini veñuhu nuú yíi ndivaha ta já najoco da dó nu Ndióxi sahá cuachi ñayivi. Joo natavá da yiquí cuñu rí jatá ñuu nu sáhmi na rí. ¹²Ta quiahva já

naxihí Jesús jatá ñuu Jerusalén. Ta naxita nii a ña ná jándoo a cuachi ñayivi. ¹³Ña cán quéa cóho nuú Jesús. Cúu á tátuhun cūhun í jatá ñuu ta a cácahan nuu yó ndoho iní xihín mé á. ¹⁴Jáchí ñuyíví yóho coó toho ni in nuú cuu coo í anda ama cáa quiví. Joo ndínducú yó inga ñuu nuú cuu coo í chága chí nuu. ¹⁵Cóho caja cáhnu í Ndióxi níi tiempo ta chindeé Jesús mí caja í ña. Ta ña yóho cúu á tátuhun ña jóco yó nu mé á sahá ña nacaja tá naxihí a ndica cruxu. Cóho caja cáhnu í mé á xihín yúhu yó jáchi cúu yó cuéntá mé á. ¹⁶A ndíndójó ndo caja vaha ndó ta ná chindeé ndo ñani táhan ndó xihín ña cómi ndo. Jáchí ña yóho cúu á tátuhun ñaha jóco ndo nu Ndióxi ta cájii ini mé á xihín á.

¹⁷Candúsa ndó na cómi cuéntá saha ndo ta caja ndó ña cúni na. Jáchí nasahan Ndióxi chuun yóho nu ná. Ta tandaa quiví nditahan ndicani na nu Ndióxi sahá ña nacaja na. Caja ndó ña cúni na já ná cajii ini na ta ná a cóo cuéha ini na jáchi a cuú quee vaha ndó já.

¹⁸Caca tahví ndo nu Ndióxi sahá nde jáchi nandivií ínima nde ta cúni nde caja vaha nde níi tiempo. ¹⁹Caja ndó ñamaní caca tahví ndo sahá í ña ná quiahva Ndióxi ñamaní nuú í saa yachi í nu ndó coto nihni í ndohó.

Xihín tuhun yóho ndihi carta yóho

²⁰Ña cúni quéa ná quiahva Ndióxi ña ná coo vaha iní. Mé a cán najánditacu tucu a Jesucristo, mé a cúu xitoho í. Ta sahá ña nacaja Jesucristo tá naxita nii a ndica cruxu sahá ña cán quéa nasahan Ndióxi tuhun a nu yó ta a ndíhi toho sahá. Ta mé Jesús cómi a cuéntá saha yó tá quiahva in pastó cómi da cuéntá sahá ndicachi jana dá. ²¹Ta ná caja Ndióxi ña ná ndindacú ínima ndó já ná cuu caja ndó tóco ndihi ña cúni a. Ta sahá ña nacaja Jesucristo ná caja Ndióxi xihín yó ndá ña nacuu ña táhan ini mé á xihín. Ná caja cáhnu í Jesucristo anda ama cáa quiví. Já ná coo.

²²Xíca tahví í nu ndo ña ná coo cáhnu ini ndó xihín tuhun cáhan í xihín ndo, ñani í, na cúu cuéntá Jesús. Jáchí carta loho cuití va nacahyí í nu ndo já ná ndindacú ínima ndo. ²³Ta cáxi tuhun í xihín ndo sahá Timoteo, mé da nasandacaan vecaa joo sa najani dá viti. Tá ná casaa yachi da yóho já saa da xihín í coto nihni nde ndohó.

²⁴Cahan Ndióxi ndó xihín tóco ndihi na jánaha tuhun Ndióxi nuú ñayivi ta cahan Ndióxi ndó xihín tóco ndihi na cúu cuéntá Jesús. Tóco ndihi na cúu cuéntá Jesús, na ndúu nación Italia yóho chíndahá na Ndióxi coo ndó.

²⁵Ná caja cuaha Ndióxi ñamaní xihín tóco ndihi ndó. Já ná coo.